

Wednesday, August 20, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

MSME WORKSHOP

Mizorama sumdawng tenaute chawilarna, tihhmasawna leh tihchakna turin, Workshop on Promotion, Development and Empowerment of MSME in Mizoram chu vawiin khan Dawrpui Multipurpose Hall-ah buatsaih a ni.

Mizoram sorkar hnuaia Commerce & Industries Department buatsaih, MSME Workshop-ah hian Ministry of Micro, Small & Medium Enterprises (M/o MSME) Secretary, SCL Das chuan thu sawiin, Mizoram hmun hrang hranga MSME hnuaia sumdawna tenau kalpui mekte chuan theihna tam tak an neih bakah hmalam hun eng tak an ni tih a hmuh theih a ti a, hetihual hian an theihna chu hlawhtling leh tha zawka an kalpui theih nan Ministry of MSME leh Mizoram sorkar chuan nasa zawka hma an lak a, hna an thawh a tul tih an lantir a ni a ti a. Sumdawna bultan leh kalpui chu thil awlsam a nih loh avangin sorkar laipui chuan ram mipuite tan theihtawp a chhuahpui a, MSME hmalakna chuan Mizoram kil tawp thleng se, Mizorama MSME hnuaia sumdawng inziaklut zat chu nasa taka pungin, hmasawn zel turin an duh a ti a, hemi tur hian Mizoram sorkar hnuaia department hrang hrangte leh agency hrang hrangte hmalakpui turin a sawm a ni.

Byte: SCL Das, Secretary, MoMSME

He hunah hian Chief Secretary Killi Ram Meena leh Mizoram Commissioner & Secretary Dr.Lalzirmawia Chhangte pawhin thu an sawi a, programme tan hma in stall an tlawh kual bawk a, MSME Ministry hnuaia scheme hrang hrang te leh a kalpui dan te zirho a nih bakah, MSME hnuaia sumdawna tenau enkawltute chuan Ministry of MSME leh Mizoram sorkar hnuaia officer lo kalte nen inkawm hona hun an nei a ni.



MURDER

Maubawk venga kum 80 mi Pi Runliani thih chungchangah Police ten rinhlelh thil thu ah mi 5 an man tawh a, chhui zui mek niin rinhlelh thil thua an man te hi thu zawhfiah an ni.

Maubawk venga Pi Runliani hi nimin khan a chenna inah thi a hmuh a ni a, thah ngei nia hriat anih avangin Mizoram Police ten hma an la nghal a, thudawn danin rinhlelh thil thua mi 5 an man tawh a, tual thattu tak erawh hriat la ni lo mahse Police ten an chhui zui mek a, rinhlelh thil thua an man te hi thu zawhfiah mek an ni.

Pi Runliani hi a fanu leh a tupa nena cheng niin an in chhungah eichawp dawr an siam a, a chenpuite hi thil thlen lai hian inah an awm lo niin thu dawn a ni a, an

dawra thil lei tur mi pakhatin thiin an inah hian a hmu a, a hrawkah chema zaina hnuhma a awm a ni.

Pi Runliani thih chungchangah hian MHIP General Headquarters chuan thuchhuah siamin Pu Runliani rawng taka thah ani chu pawl antih thu an sawi a, a chung kutthaktu chu man ngei ni se an duh tih sawiin a phu tawh hremna pek ngei ni se an ti a, hmeichhe kum upa chung thil thleng chu an ngai thiamlo hle tih sawiin thleng nawn tawhlo se an duh thu an sawi bawh.



LADC PROTEM CHAIRMAN

Lai Autonomous District Council a Protem Chairman atan MDC Pu Lalthanmawia Colney chu vawiin khan Additional DC, Lawngtlai Pu David Lalrinawma'n rinawmna tiamtirin a lalut.

Protem Chairman lakluhna hi Additional DC Chamber ah neih niin, United Democratic Alliance a MDC leh mipawimawh dangte an tel a ni.

LADC a Pu N.Zangura kaihhruai, United Democratic Alliance sorkar an pian chhoh hnuah hian Chairman Pu T Zakunga leh Deputy Chairman C Biakthansangi te chuan nimin khan banna an thehlut a, hemi hnu hian CEM rawtna pawmpuiin Governor chuan Protem Chairman atan Pu Lalthanmawia Colney a ruat a, Protem Chairman kaihhruaina hnuaiah Zirtawpni August 22, 2025 khian LADC Session ah Chairman thar thlan tum a ni.

Ruahman lawk ang chuan Zirtawpni ah Chairman thar thlan zawh, chawhnu lam ah CEM Pu N.Zangura'n thlawptu a neihdan House ah fiah tum a ni.



TUALTE TOMATO

Khawzawl District-a awm Tualte khua chuan kumin chhungin Tomato quintal 6000 chuang an thar tawh.

Khawzawl District-a kan palai thudawn danin Tualte khuaah hian kuminah chhungkaw 200 velin Tomato hi eizawn nan an ching mek a. Tomato an seng lai hian chawlhkar khatah bawm 1000 bawr (bawm khatah Kg 20 a leng) te an lo pha a. Kumin bikah hian Quintal 6000 vel thar chhuak tawhin an Tomato thar te hi a tlangpuiin Kg 1 cheng 50 bawr velin an hralh thin a ni.

Kumin ruahtui a tlak tam avangin Tualte khua in Tomato an chinnaah hian harsatna tenau an tawh ve a, Ruahtui tlak tam avang hian natna chi hrang hrang a tam bakah kumdang aiin Tomato rah pawh a tha lo deuh niin Tualte a Tomato chingtute hian an sawi a, hei vang hian Tomato thar chhuahah kumdang an pha lo mai thei tih an sawi a ni.

Tualte khua hian kum 2022 khan tomato quintal sing 3 vel thar chhuakin, kum 2023 ah quintal 15,000, kum 2024 ah quintal 16,420 an thar chhuak a ni.



TB MUKH BHARAT ABHIYAN

Kumin chhunga ram puma TB umbo tura beihpui thlakna TB Mukh Bharat Abhiyan campaign chu Siaha District ah ngawrh taka kalpui a ni a, damdawi lam thiamte kaihhruaina in hriselna dinhmun enfiah chhoh mek zel a ni.

Rampum huapa district thlanbik 347 ah TB Mukh Bharat Abhiyan campaign hi kalpui mek a ni a, Siaha District ah pawh nimin khan MADC Golden jubilee hall ah MADC Elected office bearer leh Officer te TB sreening vek niin Xray bakah zunthlum leh Bp test pawh athlawnin neih nghal a ni.



INDIA – CHINA TALKS

China Foreign Minister Wang Yi leh External Affairs Minister Dr. S. Jaishankar te chuan ram pahnih India leh China inkarah thlawhna service a awm vat theih nan hmalak thuai an remti.

He inremna hi New Delhi-a China Foreign Minister Wang Yi leh Extenal Affairs Minister Dr. S. Jaishankar te inbiakna atanga remtihna hi siam a ni a. Hei bakah hian ram pahnih ten thawh dunna tha, insumdawn tawnna kawngah an neih theih nana hmalakna hrang hrangte remtih a ni bawk.

